

光緒吉林通志

吉林通志卷九十

人物志十九

國朝四

希福

帥顏保

索尼

索額圖

額色赫

從子佟濟希佛

額司泰

鄂屯

安泰

武納格

德穆圖

齊墨克圖

希福姓赫舍里氏先世居都英額再遷哈達天命四年偕兄碩色率所屬來歸後隸滿洲正黃旗

太祖以其通滿漢蒙古文字

命直文館

賜號巴克什巴克什文臣之號猶武臣有札爾固齊若巴圖魯也文館筦機務專文字之任宰相權輿也後崇德元年改文館爲內三院有大學士學士

聖祖嘗稱大學士希福范文程甯完我額色赫自

太宗時歷任內院贊理機務勤勞久著擢用其子各一人希福功名亞文程而夙夜在公不阿權要亦稱賢相云
天聰二年

太宗親征察哈爾令徵兵科爾沁還經土謝圖額駙奧巴止

之曰寇騎充斥行將安之卽罪譴吾爲若任答曰

君命也其可以死追耶冒鋒鏑行兩晝夜達大營復奏科爾

沁兵觀望不應

命士謝圖兵出掠掠畢來會

太宗怒復遣壯士八人隨之往趣赴軍期行四晝夜至一小
屯遇敵擊斬三十餘人卒達科爾沁以其兵從征明
年奧巴至

太宗命賁讓之奧巴獻駝馬謝罪論功授騎都尉世職八年
奉

命行納幣嘉禮禮成

賜衣一襲尋征明燕京敗敵兵北門外大凌河之役偕都統
譚泰等擊錦州援兵敗之師還敵兵襲我後再擊之
皆敗去晉輕車都尉世職旣改文館爲內三院授國
史院承政旋擢宏文院大學士晉世職二等充繙譯
遼金元三史大總裁請定察治訛言戒衆之例

詔可崇德三年與大學士范文程等請更定部院官制先是
六部都察院理藩院滿洲蒙古漢人每衙門承政各
三四員餘皆爲參政官止二等至是請每衙門設滿
洲承政一員以下酌設左右參政理事官副理事官
詔可時雖以筦機務居內院數衙

命至察哈爾喀爾喀科爾沁諸部編戶口設佐領及頒法律
於蒙古平其獄訟又往來軍前相度形勢示機宜覈
功賞宣

上德意於諸降人還奏未嘗不稱

旨焉順治元年繙譯遼金元三史書成疏進之曰竊稽史冊
所載得失之故最詳治亂之機甚隱此惟聖人知之
是以人君政治之得失儒者必悉書無遺意欲敬愼
於今而垂法於後也自古帝王所行之事備載簡編
閱數千載傳至今茲亦云久矣然事雖已往可以詔
今人雖云亡可以鏡世語云善者吾師不善者亦吾

師故御世之聖王未有不法此而行者也遼金雖未
混一而遼已得天下半金亦得天下大半至元則混
一寰區奄有天下其法令政教亦有可觀者焉

先帝鑒古之心永懷不釋

特命臣等將遼金元三史芟削繁冗惟取其所行善惡得失
及征伐畋獵之事譯以滿語繕寫成書臣等敬奉

綸音將遼史自高祖至西遼耶律大石末年凡十四帝共三
百七十年金凡九帝共二百十九年元凡十四帝共一
百六十二年詳錄其有裨益者始崇德元年五月迄
崇德四年六月今敬繕成書以進書入

世祖閱數四賞賚有加時睿親王多爾袞攝政都統譚泰附之希福頗加譏切又以所得分撥第宅二區相去遠屬譚泰改撥不從事具譚泰傳會譚泰弟副都統譚布詣希福希福曰日者大學士范文程以堂餐華侈語我我對曰吾儕儒臣也非功勳大臣比安得盛饌若此遂偕往啟攝政王王以予言爲然且曰吾過矣譚布退以告譚泰因訐之法司坐僞傳王言且詆謾大臣將搆釁亂政論死王令免死褫罷之以世職行走七年遇

恩詔晉一等輕車都尉王以前事終惡之革世職並籍其家

八年

世祖親政雪其冤復世職給產仍授安文院大學士九年充纂修

太宗實錄總裁官充會試主考官遇

恩詔晉男爵又

特旨以當

太祖

太宗朝忘軀奉使及迎扈后妃轉側兵戈擾攘間竭盡心力晉男爵一等又遇

恩詔加一雲騎尉又以定鼎燕京時眾官例晉秩獨以罷任

未與特晉子爵世襲罔替冬授議政大臣尋卒年六十有四贈太保諡日文簡立碑墓道紀其功焉子奇塔特襲爵希福更官制議

欽定國史其傳略弗詳豈非以各部院請獨設滿承政示天下不廣乎然制因時立亦無嫌焉爲補載之俾來者有以考當時之制其後滿漢兼設又以見我國家度越有元之偏任蒙古及色目人

社

稷靈長所由億萬年勿替也帥顏保其次子自有傳帥顏保性寬厚有幹事才康熙元年

聖祖以其父希福與范文程宵完我額色赫並於

太宗時任內院大學士贊理機務勤勞久著宜擢用其子而
文程額色赫子已用爲內院學士

詔希福宵完我子亦以學士用於是長子奇塔特旣襲父子
爵擢帥顏保國史院學士六年教習庶吉士充纂修

世祖實錄副總裁八年擢吏部右侍郎尋出爲漕院總督疏
言淮安爲水陸孔道乃十五里內連設三關其板閘
鈔關與淮安倉之稅戶部差員征收清江廠船料等
稅工部差員征收胥役繁多商人耗費且稽延時日
請以三關額課歸併一關征收則胥役減而商民俱

便疏下部議戶部言淮安倉稅應歸併淮安關工部
言清江廠之稅爲修造漕船經費宜分征如舊

聖祖以廠稅歸併一關亦不致虧課

命九卿科道再議如所請九年疏言淮揚二府屬州縣上年
夏秋被水已奉

旨令督撫察勘災傷分數蠲免額賦其漕糧漕項例不蠲免
而高郵州宿遷桃源鹽城贛榆等縣連歲歉收所有
上年應征及帶征舊欠萬難併征請

敕部議疏下部議及折帶征得

旨高郵等處災傷與他處不同其未完未征漕米仍令帶征

恐小民不能完納以致困苦下部再議蠲免康熙六七兩年未完漕米三萬一千餘石又疏言戶部令漕項錢糧俱以制錢收放伏思漕項錢糧非解部交納卽納丁濟運以及修造漕船之需與本地支銷者不同且漕糧行月白糧經費領運長途遇淺起剝遇溜添簣所費不貲勢難負錢遠涉應仍准征銀支給疏下部議從之十二年同河道總督王光裕疏言舊例每年漕運全完河工歲修告竣舉劾所屬文武各官以示勸懲至康熙四年部議停止伏思漕糧征兌匪易運解維艱且需多方催儻使如期抵通至黃河頂衝危

險運河旱澇疏濬惟賴經管各官竭力殫心不辭勞
瘁庶河流循軌而漕艘得以飛輓若勤惰罔分恐因
循貽誤請仍遵舊例每年分別舉劾疏下部議行於
是奏薦山東糧道遲日巽河南糧道范周無錫知縣
吳興祚等又劾罷溧陽知縣王錫琯等十三年逆藩
吳三桂遣兵窺江西守禦虛

詔率所部往駐旣以安親王岳樂已統師抵南昌

命回任所十七年安親王進征湖廣仍率兵鎮守南昌旋移
鎮吉安十八年疏言吉安各屬眾山連接逆賊盤踞
出沒不時臣令副將色勒許壯猷遊擊章紘等率兵

分堵緊要隘口斷賊糧道相機剿撫別令知府蔣維藩會同遣官入賊巢宣布

敕旨降偽總兵副將以下五十餘員兵萬餘十九年平南王尙之信護衛張永祥首告之信跋扈怨望之罪逮繫勘鞫

詔將軍賚塔以罪不株連論藩屬

命帥顏保自吉安移兵南雄韶州擇駐要地尋

命回任所二十年内擢工部尙書旋調禮部二十二年以疾解任二十三年卒年四十有四

賜祭葬如故事子赫奕由侍衛授內務府總管累官至工部

尙書

索尼父碩色大學士希福兄也旣率屬自哈達來歸太祖以其兄弟父子通滿漢及蒙古文

命直文館與機務並

賜號巴什克又授索尼一等侍衛使出入扈從索尼忠亮有大節危疑震撼之交毅然不可奪逮事

四朝兩與

末命當時之事史或未詳觀

世祖

聖祖所褒可想見其概謂之宗臣其亦無愧矣乎哈達嘗以

兵犯界藩城先衆擊敗之從征董夔蒙古援兵大集
立二寨相犄角與譚泰分兵攻之拔其一寨餘一寨
降天聰元年從

太宗攻明錦州遇敵兵千餘徙大凌河戶口自料所從裁二
十騎竟襲擊破之旋偵敵甯遠城內兵突出從騎頗
懼獨前搏戰甚力敵敗退追擊至城濠乃返二年

太宗親征喀爾喀徵兵外藩科爾沁不至旣

遣希福率壯士八人往趣之

詔與侍衛阿珠祐齎

敕責土謝圖額駙奧巴初奧巴爲台吉入

朝

太祖以貝勒舒爾哈齊孫女妻焉旣而屢違約私與朋通徵兵亦不至於是受

方略以行旣入其部部人饋特性麾去之曰爾汗有異心爾物安可食耶部人以告奧巴方病足居別室心動而索尼與阿珠祐詣見公主以有

敕遣告奧巴奧巴扶掖至仍佯問曰若爲誰索尼曰

天使也爾有罪義當絕今特以公主故使來餽問耳奧巴語左右具饌不顧而出奧巴恐使台吉塞冷等請其事出

璽書示之仍令從者先行奧巴得書大驚令所屬跪請曰汗
獲重罪甚皇懼今寇騎塞路使者卽歸遭侵掠益滋
汗咎請少留索尼曰衛

君命而來宜亟歸報死何足云立起整轡眾環擁之曰汗欲
引罪自謝乃止翼日奧巴以足疾欲令其台吉拜恩
噶爾及桑噶爾賽偕使者入謝索尼曰汝欲解己罪
而使二人行吾豈爲拜恩噶爾輩來耶奧巴乃使人
請曰

上怒我我固應肉袒謝懼不我容耳答曰

皇上覆載如天地汝果引咎入

朝雖有罪必蒙

矜卹保無苦也於是奧巴計決索尼知其誠心悔過乃與阿珠祐偕其大臣黨阿賴先歸奏

聞俱稱

旨三年從征明至燕京宵遠巡撫袁崇煥等赴援列營城東南奉

命傳令左翼擊之貝勒豪格先馳入陳敵兵四合矢集如雨索尼躍馬突入東西馳擊斬殺甚眾拔貝勒於重圍明年大軍至榛子鎮城中無守者偕文臣達海領漢字

十
詔諭降其民又撫定沙河驛越日拔永平與達海奉

命執黃旗於城上以漢語徧諭軍民城中皆歸順師旋留隨

貝勒阿巴泰等率將士鎮守五年朝鮮使樸蘭英來
朝

賜其王瀼以賞薄辭與參領英俄爾岱斥責之懼而拜

命擢吏部啟心郎從圍明大淩河城援兵自錦州至持短兵
歛前逆戰敗之既克錦州奉

命往瀋陽宣布捷音尋率兵偕朝鮮使臣至軍其冬與達海
等奏定元旦朝賀儀制明年從征察哈爾由大同入
明邊取阜臺寨會六部官署工竣

太宗詔同諸啟心郎

諭啟迪諸貝勒俾勤事改過無曠厥官八年授騎都尉世職

仍與學士羅什等日直內院凡宣示

詔令及察審功罪咸稱

旨有

旨以郡王禮祭貝勒岳託吏部尙書阿拜誤以岳託子襲封

郡王傳語都統葉臣事

聞下廷臣議誤傳

詔旨罪以官吏部應連坐罰鍰

太宗曰索尼未經奉

旨豈肯妄言

特命免議其誠結

主知如此崇德八年超授男爵順治元年都統何洛會等訐告肅親王豪格言詞悖妄王坐廢爲庶人

詔王大臣集眾宣示以索尼忠貞不附王

賜鞍馬二年晉爵二等子是時睿親王多爾袞攝政以旣授子爵不宜復列郎官令解啟心郎任仍理部務先是索尼諸父希福以不附睿親王爲都統譚泰所構罷會譚泰隱匿

詔旨索尼發其事譚泰亦坐削公爵謂有求古琴於索尼者

於庫取漆琴與之

譚泰傳言於內庫鼓琴各仍其舊文

令僕從捕魚

禁門橋下庫院草長使牧者秣馬院中臙狀劾之下法
司論死睿親王奏從輕典削世爵永不敘用遂坐廢
三年護軍統領圖賴劾譚泰嘗私要以書與有連逮
問事具譚泰傳索尼旣昭雪尋復子爵願終不附睿
親王有所瞻徇遇事多以理爭王由是惡之五年貝
子屯齊訐其崇德八年秋與圖賴等謀立肅親王私
結盟誓罪死有

旨免死削世爵輸贖遣守

昭陵追奪

賞賜八年

世祖躬親大政以前議索尼罪不實

特詔還朝曰朕登大寶索尼精誠自矢克襄洪業眞忠節臣也復其爵再遇

恩詔晉伯爵子世襲九年

命諸王議功晉一等伯

賜敕免死二次擢內大臣兼議政大臣總管內務府事一旦起竄謫被

恩遇至於如此知當日左右

世祖必有宏濟艱難瀕死不顧者故曰精誠自矢也而史闕

其事並其功之議於諸王者亦略弗詳惜哉十七年
應

詔上言十一事一曰小民冤抑有司不爲詳審者宜別爲嚴
察使無壅於上

聞二曰凡犯罪發覺問官以奉有

嚴旨往往不察其情輒加重罪不無枉濫乞

敕法司量情詳審三曰前議福建將士罪在大將軍者止削
一不世襲之騎都尉而所屬將領其子爵男爵乃盡
議革輕重不均有乖懲勸請

敕更正四曰凡開國之臣自騎都尉以上皆有功行聞及贊

成大業者所授之職宜于世襲其後非有戰功

恩詔所加不宜給世襲

敕書五曰在外諸藩風俗不齊若必嚴以內定之例恐反滋擾宜格外寬容六曰近聞大臣勢豪奪據行市奸宄之徒投託指引以攘貨財請

旨嚴禁七曰今四方商賈擔負捆載來京者多爲旗下大臣家人短價強買人將畏而不前請察禁八曰諸王貝勒以及各官私引玉泉山之水爲灌溉致竭泉流請禁止九曰邊外木植皆商人僱民採伐水運解部故額稅之外令自售賣使利及商人今聞大臣於採木

之地私行強佔以致商不聊生請禁止十日大臣不殫力公事惟飾宅第請懲禁十一日五城審事諸官遇世族富家與窮民構訟必罪窮民曲意徇私不思執法請嚴飭無得枉情納賄恣意妄行至入

世祖以所奏皆實宜申禁

飭部議行十八年正月

世祖不豫越數日大漸

召翰林院學士麻勒吉王熙至養心殿草遺詔立

聖祖爲皇太子並

諭以索尼及蘇克薩哈遏必隆鼉拜四人爲輔政大臣翼日

世祖賓天索尼言於諸王貝勒曰今

大行遺詔命輔佐

沖主自來

國家政務惟宗室協理索尼等皆異姓臣子何以任此
今宜與諸王貝勒共任之諸王貝勒曰

大行惟知四大臣可任故委以政務

詔旨甚明誰敢干焉四大臣其勿讓於是奏知

皇太后盟誓於

大行梓宮之前然後受事尋蘇克薩哈與鼐拜爭事成隙索

尼惡之老矣且有疾康熙六年與輔臣奏請

聖祖親政有頃

詔曰輔政大臣伯索尼自

太祖朝在內院黽勉效力

太宗任以內外大事果而能斷殫厥忠誠及

太宗上賓時重念

皇祖恩遇堅持忠貞之心不惜性命克勤皇家

世祖時亦任以內外大事竭盡純篤以其勲舊大臣夙秉忠

貞堪受重託

遺詔俾令輔政恪遵

顧命夙夜靖共厥績茂焉今旣染疴且復年邁宜特加恩寵

以示酬庸之典下王大臣會議晉一等公爵與前所授一等伯爵並世襲疏以

寵榮逾分悚仄難安陳情辭一等公爵得

旨嘉獎仍令祇遵

成命不必遜辭是年卒

賜祭葬有加禮諡曰文忠以第五子心裕襲一等伯第六子法保襲一等公長子噶布喇

聖祖因

孝誠仁皇后

推恩所生授一等公爵第三子索額圖官至大學士自有傳

盛矣哉諸子相一上公二伯一赫舍里氏之顯貴卓
絕當世天所以報貞臣也而負荷或墜則有人事存
焉噶布喇累官內大臣康熙元年擢領侍衛內大臣
十三年封公尋加太子少師二十年卒

賜祭葬如故事諡恪僖

索額圖初任三等侍衛洊遷一等康熙七年授吏部
右侍郎八年奏請解吏部任效力

左右仍爲一等侍衛內大臣鼐拜以罪拘禁大學士班布爾
善坐黨誅授

國史院大學士兼任佐領九年改三院爲內閣授

保和殿大學士十一年

世祖實錄告成以總裁官加太子太傅十五年同大學士巴

泰杜立德等劾奏內閣票本錯誤改寫草簽請

敕部嚴察情弊於是大學士熊賜履以改寫草簽復毀之罷
歸十八年京察翰林院以侍講學士顧八代隨征稱
職注考日政勤才長索額圖改注浮躁顧八代坐降
調七月地震左都御史魏象樞陳言

召對奏請重譴索額圖

聖祖謂修省當自朕躬始翼日

召索額圖及眾大臣

諭曰茲者異常地震朕反躬修省力圖挽回

天意爾等亦宜洗滌肺腸公忠自矢且自任用以來家計頗已饒裕乃全無爲國之心朋比徇私朕聞之已久猶望悛改未令議罪今所行愈加貪黷一旦發覺國法具在決不寬宥十九年以疾請解大學士任得

旨卿輔弼重臣勤敏練達自用兵以來翼贊籌畫克合機宜覽奏情詞懇切著於內大臣處上朝加意調攝以副眷懷尋授議政大臣初逆藩吳三桂反以謂因撤藩激變請誅建議之人

聖祖弗許二十二年雲南平

諭大學士明珠等曰吳逆倡亂有謂撤藩所致請誅建議之人朕若從之則皆含冤泉壤矣先是索額圖之兄噶布喇任領侍衛內大臣以

冊諡

孝誠仁皇后

推恩所生封一等公弟心裕法保分襲父索尼世爵累官至
鑾儀使與內大臣二十二年

諭議政王大臣曰心裕以情數空班朕交索額圖議處乃止
議罰俸一年又法保亦因情革退內大臣隨旗行走不思
效力贖罪在外較射爲樂索額圖亦弗教訓且自恃巨富

日益驕縱朕時加訓飭並不悛改著嚴加議處於是議心裕革鑾儀使佐領一等伯法保革一等公索額圖革議政大臣太子太傅內大臣佐領

命心裕留一等伯索額圖留佐領二十五年授領侍衛內大臣時俄羅斯屢犯邊境侵據雅克薩地築城我兵攻之其汗察罕遣請釋圍

詔許退兵令別遣使來議地界二十八年使至尼布楚

命索額圖等往議議定立碑示久遠事具郎坦傳二十九年命統盛京吉林科爾沁兵往會裕親王福全於巴林進征噶爾丹擊敗之烏蘭布通師還以噶爾丹敗遁不率兵

追勦坐禪職

命降四級留任三十五年

聖祖親征噶爾丹由中路進

命領八旗前鋒察哈爾四旗及漢軍綠旗兵前行並經理火

器營事五月

駐蹕什巴爾台以大將軍費揚古西路兵甫至圖拉

詔詢王大臣進兵遲速機宜索額圖言宜緩行以待西路兵

聖祖密諭費揚古截噶爾丹歸路

親統師駐克魯倫河噶爾丹望見

御營大驚奔竄費揚古邀擊於昭莫多大敗其眾

聖祖乃班師三十六年

駕臨甯夏索額圖從

回鑾至船站

命管理水路設站事務是年噶爾丹竄死論隨征功復原級

四十年以老乞休

允之心裕代爲領侍衛內大臣四十一年

聖祖閱河至德州

回鑾

特召索額圖侍皇太子允初養病德州後一月乃偕還京未幾心裕以酷斃家人罷前索額圖亦爲家人所訐告

留中四十二年

命侍衛海青等傳

諭曰爾家人告爾之事留內三年朕有寬爾之意爾殊無愧悔議論國事結黨妄行舉國俱係受朕深恩之人若受恩者半不受恩者半卽俱從爾矣去年皇太子在德州時爾乘馬至皇太子中門方下卽此是爾應死處爾旣罷大學士後復起用並不思念朕恩夫養犬尙知主恩若爾者雖格外加恩亦屬無益朕欲遣人來爾家按看恐連累者多所以中止若將爾行事指出一端卽可正法尙念爾原係大臣朕心不忍但令爾閒住又恐結黨生事著交宗人府

拘禁尋死於禁所後數年皇太子允礽以狂疾廢

詔廷臣曰昔允礽立爲皇太子時索額圖懷私倡議凡服御諸物俱用黃色所定一切儀制幾與朕相似驕縱之漸實由於此索額圖誠本朝第一罪人也

額色赫姓富察氏世居訥殷後隸滿洲鑲白旗祖莽吉圖當

太祖時率部落來歸天聰初額色赫以護軍校數從征討授兵部理事官九年從征黑龍江有功先還奏捷崇德三年擢秘書院學士五年齋

敕赴錦州

諭睿親王多爾袞駐兵機宜會都統圖爾格敗明兵於木倫河以捷還奏六年同大學士范文程剛林及圖爾格等往訊圖錦州大軍離城遠駐遣兵歸家等狀王貝勒大臣皆引罪旣而明經略洪承疇率眾十三萬援錦州至松山受

太宗方略往諭諸將還奏敵勢甚眾請濟師

太宗遂統大軍親往擊敗之七年鄭親王濟爾哈朗克錦州祖大壽降奉

命至軍撫慰降眾八年隨貝勒阿巴泰征明至山東下兗州偕參領穆成格等奏捷順治元年

世祖定鼎燕京論功授騎都尉世職四年考滿兼一雲騎尉
五年遷刑部啟心郎八年擢

國史院大學士九年充纂修

太宗實錄總裁官會試正考官列議政大臣復充武會試正
考官屢遇

恩詔晉世職至一等輕車都尉十二年加少保兼太子太保
再充會試正考官時方纂輯

太祖

太宗聖訓又奉

詔取經史中忠臣孝子賢人廉吏事蹟語言分類採輯成書

名曰資政要覽並充總裁官十三年

敕使朝鮮鞠獄是年考滿晉太傅兼太子太傅廕一子入監
十五年改

保和殿大學士十六年

詔獎奉職勤勞諸臣晉少師兼太子太師十八年卒於位
賜祭葬如典禮諡文恪子塞色赫襲爵是年冬吏部推陞學
士

聖祖詔曰原任大學士額色赫於

太宗

世祖兩朝效力有年敬慎素著始終克勤職業其子塞色赫

可補內秘書院學士塞色赫亦勤慎累官禮部尙書額色
赫弟曰額司泰自有傳諸父行曰鄂屯曰安泰從子
曰佟濟曰希佛鄂屯安泰亦自有傳佟濟父喀爾喀
馬安泰之兄而孟古慎郭和長子也天聰時以佐領
厯官爲

福陵總管佟濟少從征伐入山海關定燕京皆有功順治十
五年自佐領累官至前鋒參領十七年從征福建以
水師攻鄭成功於廈門斬其參將林登獲戰艦及印
各一旋趨蓋峙山遇敵戰甚厲殉焉

卹贈騎都尉希佛其弟也初任侍衛坐事褫思以功名自前

秋用披甲從征福建每戰爲軍鋒與兄同時沒於陳
又弟訥泰累官副都統

額司泰事

世祖爲一等侍衛康熙三年擢鑲白旗蒙古副都統九年遷
護軍統領十二年逆藩吳三桂反

聖祖命順承郡王勒爾錦統師往討額司泰參贊軍務會侍
衛阿爾賽自荊州還奏賊由貴州陷沅州總兵崔世
祿降賊澄辰道梗湖以南半入於賊總督蔡毓榮亦
飛章入告因

詔同護軍統領伊爾都齊簡精銳先發十三年春抵荊州

聖祖以常德長沙爲三楚要地

命與前鋒統領碩岱都統珠滿移守焉而二郡已陷於賊仍駐荊州未幾賊將劉之復陶繼智率賊萬餘犯宜昌營江之兩岸總兵徐治都告急自荊州移師往援與治都等以舟師橫江逆擊戰甫交賊潛以三百人登岸擾我後我分軍擊之敗去獲賊舟三進次岳州界時三桂據澧州其黨吳應麟廖進忠柯鐸高起隆據岳州而馬寶胡國柱復率衆二萬自澧州水陸並集且於陸地設鹿角阻我騎兵與貝勒察尼將軍尼雅漢定議山岡爲賊門戶令前鋒軍先奪之以扼其吭

令護軍驍騎各軍分路截擊又檄綠營兵奪據城陵磯及七里橋使賊首尾不相顧至期貝勒營鳴角卽鳴角以應率前隊戰艦進擊諸軍以次並進鏖戰久之攻毀賊船甚夥殲賊萬餘賊退據七里橋東木柵乃收軍還營是年冬

詔參贊貝勒尙善軍規復岳州值賊勢披猖未能進取久相持十五年春

詔尙善頃安親王岳樂已復萍鄉醴陵進取長沙逆賊吳三桂遣其黨馬寶高起隆自岳州赴援賊勢旣分毋坐失機會於是尙善以水陸所部諸軍俾統之進剿賊船列陳洞

庭湖鐵鎖句連堅不可撼自率銳卒攻其北令副都
統路什攻其南兩路夾擊軍士皆銳進不退賊遂大
敗追擊三十餘里賊之據君山者亦遁獲船五十二
偽印五纛仗盔甲無算擒百七十餘人十六年卒於
軍初統師王貝勒數奏敗賊功

詔嘉獎之俟事平議敘十九年大軍凱旋部議王貝勒大臣
等征岳州時退縮不前罪既病沒應籍家產

聖祖原之額司泰偉幹有雅量卹軍愛民方戰洞庭湖磨礮
直入賊陳賊船環指曰彼髯而修者額司泰也礮矢
叢集如雨夷然不動磨礮進如前手殺數十人賊氣

言才選卷之十一
三
懾而潰其在軍圖由楚入滇山川要害日諦觀之志
蓋有在旣寢疾旦飲水一二合猶強自視事卒之日
軍民各爲位哭奠云

鄂屯孟古慎郭和子也以父任爲佐領天聰五年偕
佐領吳巴海隨副都統蒙阿圖征瓦爾喀進師黑庫
倫及額勒約索降其部衆崇德元年予騎都尉世職
三年任戶部理事官六年大軍圍明錦州其經略洪
承疇率兵赴援我右翼兵與戰於松山失利兩紅旗
及鑲藍旗駐營地爲所奪鄂屯以所屬三十五人守
山巔力戰敵不能勝罷去破

優賞順治元年從睿親王多爾袞入山海關偕參領珠瑪喇
擊敗流賊李自成騎兵追至望都復敗之論功兼一
雲騎尉三年隨副都統巴山等率兵駐防江甯任協
領聞巢縣爲賊襲據卽率兵攻復其城六年同提督
張大猷勦六安州山賊陳斬賊渠張福寰先是江甯
設總督漕儲兼理錢法戶部侍郎

詔鄂屯兼任之尋裁仍專任協領三遇

恩詔晉世職一等輕車都尉九年平南將軍金礪以鄭成功
侵據海澄請增兵進勦部議調江甯駐防兵二百往
助於是與理事官額赫納烏庫理率以行至攻海澄

之東壘敵來劫紅衣礮同額赫納擊卻之既悉眾十餘萬來犯三戰皆捷敵毀橋拒守同烏庫理擊潰其眾先後招降敵兵數千平寨數十師還以功兼一雲騎尉十六年因老乞休康熙十五年卒子鄂塞襲職安泰

太祖初任諸王侍衛從

太宗征伐常爲軍鋒所向克捷以功授前鋒侍衛順治元年從入山海關擊流賊李自成僞總兵唐通敗之追擊於安肅望都多所斬獲從豫親王多鐸南征擊賊潼關六戰皆勝移師江南戰勝睢甯縣旋從貝勒博洛

趙杭州擊敗明大學士馬士英兵偕攻湖州府克之
予雲騎尉世職三年從肅親王豪格征四川擊流賊
張獻忠及賊黨何進忠等九戰皆有功擢前鋒參領
五年從征湖廣戰沅州靖州捷者六陳斬總兵擒副
將各一人遇

恩詔晉世職騎都尉坐革明年事白復世職如故尋擢副都
統康熙十二年卒

賜祭葬如故事

武納格姓博爾濟吉特氏世居葉赫後隸蒙古正白
旗性聰敏兼通蒙古文漢文有謀略知

天心東眷以妻子來歸

太祖賜號巴克什驍勇善戰所至輒有功而

太宗時我大安口城爲明兵所攻奪守將跳而免聞卽往往
卽攻克尤爲世所稱云歲癸丑從

太祖征烏喇其貝勒布占泰詭詞求免

太祖有許其悔過意於是與五大臣並言布占泰反覆難信
兵不可數動宜乘勢滅之比戰甚力烏喇由是平以
功授男爵天命十一年大軍圍明甯遠未下

命分兵攻海中覺華島參將姚撫民擁衆四萬倚島列營鑿
冰十五里爲濠衛以車輜至遠奪其濠口然後進攻

敵敗無所遁殲焉焚所積聚並船二千餘天聰三年
從

太宗征明入龍井關克遵化進薄燕京營城北土城關其督
師袁崇煥率總兵祖大壽來援左翼蒙古兵驟進不
勝率右翼逆戰敗之

賜所俘獲之半犒其軍別攻固安縣克之尋同額駙蘇納等
征察哈爾降其邊境二千戶以歸途次降者窺我兵
少謀叛歸明於是誅其桀黠釋二台吉不殺俘餘眾
八千有奇

太宗頒賞有差而責武納格蘇納殺降奪所給四年以都統

從征明克永平敵兵三千自玉田至擊走之獲馬百餘自永平略地豐潤還知大安口城不守明兵四千入據其中亟麾所部以進所謂聞卽往往卽攻克者也五年從征明明總兵祖大壽守大淩河城其杏山守將書約全軍棄城或單騎潛來獲其書以獻因築壘鑿濠爲久困計所部營城東南

太宗自御營幸貝勒阿濟格軍見大壽縱兵出分道圍我所
得臺堡傳

命各都統進擊阿濟格軍先出使者未至武納格軍亦出遂
夾攻之我軍見

御藤高揚勇氣自倍推刃而前殲敵過半自是城中兵不敢復出

太宗命以阿濟格武納格於大淩河敗敵狀露布瀋陽六年招撫大同宣化邊境察哈爾部民七年同貝勒阿巴泰等攻明山海關俘獲人衆牲畜甚夥明兵自後來襲戰卻之

太宗謂諸貝勒大臣曰武納格數有功今又讓諸軍先行獨殿後敗敵人臣爲國不當如是耶超晉三等公爵世襲罔替

賜之敕書八年

太宗率諸貝勒分道征明以蒙古兩翼師與貝勒德格類收
察哈爾內附千餘戶自獨石口越長安嶺至保安州
被

敕書諸貝勒兩藍旗公武納格等會大軍應州所過或攻或
撫均稱

旨旣自得勝堡班師遇蒙古逃入陽和者幾五百人收之俾
從征戰喀爾喀部長疏屬自察哈爾來附爲誰何所
賊奉

命以兵百人偵緝斬二十餘級以還九年卒

賜祭葬如典禮子三人幼子廣泰襲爵長曰德穆圖次日齊

墨克圖

德穆圖初任佐領崇德三年擢戶部承政尋以更定官制改右參政四年從

太宗征明至松山以雲梯攻其城敵自錦州來援度不能克棄之還諭死

詔從寬罰贖六年兼任副都統隨鄭親王濟爾哈朗圍明錦州有守郭之蒙古貝勒諾木齊等約降鄭親王令迎之會明人已覺諾木齊率眾蒙古與戰德穆圖挾諾木齊子阿桑喜以出大兵克其郭諾木齊始來歸師還以昔詭言挾諾木齊父子俱出坐視參政及副都

統籍家產半鞭百以贖論專管佐領事七年隨貝勒
阿巴泰証明自薊州入邊薄燕京至山東明年凱旋
被

優賚順治元年從入山海關破流賊李自成追敗之望都論
功授騎都尉世職二年隨豫親王多鐸擊敗自成於
潼關河南平進兵江南擊明將鄭鴻逵於瓜州偕都
統瑪喇希徇常州再與明將黃斐戰連敗其眾分兵
攻宜興崑山等縣並克之論功兼一雲騎尉復任本
旗蒙古副都統三遇

恩詔晉一等輕車都尉九年卒子霍達襲

齊墨克圖早從征伐崇德三年同參領沙爾虎達等率蒙古四十人略地甯遠至紅山口遇明兵百人敗之追斬其裨將二是年弟廣泰隨豫親王多鐸征明坐違令不前削所襲公爵明年

太宗命齊墨克圖降襲一等男旋偕沙爾虎達等率哨卒至錦州敵兵五百來追還擊敗之獲馬六十及其大薩大兵三圍錦州並在行間有功而初圍尤著方我軍之至敵出城搏戰縱軍橫擊之陳斬十人旣攻明經略洪承疇步兵三營偕參領吳拜先眾馳擊敵騎來援復逆擊敗之八年同護軍統領阿爾津哈甯阿等

征黑龍江諸部圍都里克克之又招降大噶爾達蘇
小噶爾達蘇及能格爾三屯俘獲無算師旋

賜貂皮銀幣尋擢本旗蒙古副都統順治二年諭從入山海
關破流賊功兼一騎都尉併爲子爵三年從定西大
將軍何洛會征陝西叛鎮賀珍分兵破賊黨劉文炳
於浦城珍遁武功追擊之斬獲甚衆五年卒

詔以其子薩哈納襲騎都尉世職仍

命廣泰襲一等男爵念武納格功也